

Pressebericht Starkenburger Echo

10.02..2007

Fräulein vum Amt

Guden Dach, ehr liewe Mitmensche. Ich hoff, dass alles gut uff de Boa is un koans vun Eich mit-rer Gripp im Näscht laije muss. Brrr, hot's mich als die Woch iwwer gschuggert. Des Nass-Kalte zieht dorch alle Ritze un schläigt sich uffs Gemiet. Gott-sei-Dank hämmer Fasnoacht, wu momendoan e-bisselsche Farb ins Läwe bringt. Ich häb mer verzähle losse, dass beim Fraebund de Deiweil lous war. „Stimmung hoch drei plus Sternchen“, hot die Zeidung geschrewwer kadde. Weil's de Fraebund is, glaab ich's uff Punkt un Komma. Der Fraebund war schon immer spitze. Die Schwester Elfriede als Meisje uff de Veroinshausbiehn – des is Fasnoacht pur.

„Weiber, Weiber, Weiber“, singt als hait noch de oald Hesters – un kimmt dann zum Ergebnis: „Ja, das Studium der Frauen ist schwer.“ Dass ich net lach: Mer sin alles niedliche, brave, harmlose Frae un leicht auszurechne. Schwer sin mer na uff de Woog. Sogar die houch Geistlichkeit zieht sich neijerdings Fraueklamodde ou. Prost un Helau uff die Clementine, em Papschd soi Butzfraa. Wie soage als die Lait vun Sankt Peter: „Eigener Herd ist Goldes Wert.“

En richdische Fasnoachter hot all soi fünf Sinne beisoamme: Unsinn, Wahnsinn, Bläidsinn, manchemool sogar Schwachsinn un Stumpfsinn. Goanz im Vertraue unner uns un bitte nix weierer-soage: Wann's als um Fasnoachts-Adiggl gäiht, kenne die Schreiberling koa Grenze un troage ziemlich dick uff. Alles is super, alles mega, alles Extraklasse, alles einmalisch. Woas issen schon „Mainz bleibt Mainz“ gäije die Kappesitzung vum Hoaseveroin? – äwwer Hallo!

Friejer war ich selwert noch in de Bitt. Woann ich hait noch aktiv wer, deed ich garandiert als „Fräulein vum Amt“ kumme. Ehr glaabt net, ehr liewe Lait, wer bei mer dehoam in de letschde zwaa Woche alles ou-gerufe hot – un all häwwese sich beschwert driwwer, dass die Stadt nimmäi im Telefonbuch zu finne is. Des is zwar e oaldi Kamell, äwwer trotzdem noch e ganz groußes Problem. Erschd jetzt stellt sich raus, dass unsern Boijemoaschder am total falsche Enn gspart hot. De Herr Herbert, es „Haddsche“, erinnert mich an-en oalde Spruch: „Am Zapfen sparen und am Spundloch wieder herauslaufen lassen, das spart nicht.“ Gut, gälle?

Moin Nochber, wu sunschd en zurückhaltende Mensch is, hot vorgeschdern gschennt wie-en Rouerspatz. „Tiefste Provinz“, horrer gsoad. Der gut Moann hot verzweifelt versucht kadde, die Rothausnummer zu finne un außerm Schwimmboad un de Stadtbischerei nix gfunne. Am Schluss hoddem die Vermittlung vum Landratsamt weierer-geholfte. Un wer meld sich im Rothaus? En junge Moann, wu iwwerhaupt net richdisch deitsch kann, unser Hepprumer „Fräulein vum Amt“. Nix gäije Auslenner, wärklich net – äwwer in die Zentrale gehäijert jemand, wu de Lait weierer-helfe kann. Zustand sin des bei uns – Zustand wie bei's Hembels unnerm Sofa.

Hepprum als Kreisstadt wärd immer mäiner zu-eme Dorf. Geebt's noch Bauern, deed ich sogar vum Kuhkaff redde. Dass an unserm Bahnhof die meischde Zigg vorbeirausche, basst genaas ins Bild. Es beschde am Bahnhof is die „Schlagzeil“ näwedrou. Die Boahn muss uffbasse, dass net noch mäiner Lait vum fahrende Zugg abspringe. Husch, husch is die „Huschhusch“ weg, un die Lait steige wärrer ins Audo um.

Bei däre Geläijenheit: Zigg gibt's wie Sand am Meer – außerm Zugg vun de Eiseboahn de Feschd-Zug, de Schrift-Zug, de Wesens-Zug, de Schach-Zug, de Atem-Zug un de Luft-Zug. Un en Zug auseme Schobbegloas is en arig befreiende Zugg. De allerschensd Zugg hämmer äwwer noch vor uns: unsern Fasnoachts-Zugg moije in-rer Woch. Helau Hepprum, Helau Fraa Zugmarschall, Helau Hans-Jürgen.

Bis die negschd Woch

Eijer Bawett